

بِسْمِ اللَّهِ الرَّحْمَنِ الرَّحِيمِ

Khutba Jummah

HADHRAT AMIR'UL MUMINEEN MUHYI-UD-DIN

Munir Ahmad Azim

06 Mars 2015 ~

(14 Jamad'ul Awwal 1436 Hijri)

(Résumé Khutba)

Après ki li fine salué tous so bane disciples (et tous bane musulmans) du monde entier par « Assalamoualaikum Warahmatullah Wabarakaatuhu » Hazrat Muhyi-ud-Din fine commence so Khutba Jummah avec Tashahhud, le Ta'ouz, Surah Al Fatiha, et ensuite li fine dire:

Faudé zamais nous faire étalaze de nous bane bonnes actions. L'islam accorde ene grand l'importance à la sincérité. C'est ene de bane raisons kifaire nous fine recevoir bane avertissements (de la part d'Allah) contre saki nous appelle *Ar-Riyaa* et *Soumrah*.

Ar-Riyaa li pli connu comme « ostentation – montré lizié dimounes », « la vanité » ou encore « ene action ki faire pour montrer les z'autres ». *Soumrah*, kanta li c'est ene kitchose ki nous faire, dans le seul but pour ki bane les autres dimounes cause de sa action là.

Ene de bane façons ki Shaytane empoisonne sincérité d'ene croyant c'est kan li incite li pour ki li cause de so bane bonnes actions à bane les autres dimounes, c'est-à-dire, « faire publicité ». Voici détros l'exemples kot, soit consciamman (ou inconsciamman) ene dimoune commette *Ar-Riya* ou *Soumrah* en plaçant dans so conversation à ene l'autre dimounes bane phrases suivants :

1. « *Ti pé fer frais kan mo fine levé à 3 heures du matin pour Tahajjud.* »
2. « *Alhamdolillah, grâce à bane Roza Nafil ki mo fine gardé, mo fine capave perdi détros kilos ki ti enplisse.* »
3. « *Mo content donne charité kan mo gagne l'occasion...* »
4. « *En vérité, la lecture du Quran li ene source de tranquillité. Tous les jours, kan mo termine lire Quran après Namaz Maghrib, mo ressenti couma ene poids en moin lors mo z'épaules (mo senti moi soulagé)...* »

Dans plusieurs *ahadith*, Nabi Kareem Hazrat Muhammad (saws) fine enseigne nous ki ene de bane qualités d'ene bon croyant, c'est ki li pas étale so bane bonnes actions en public. Hazrat

Muhammad (saws) fine dire : « *Sept dimounes pou à l'abri de l'ombrage d'Allah le Jour kot pas pou ena aucaine les z'autres l'ombrage excepté l'ombrage d'Allah : ... (et parmi li fine mentionne) Ene dimoune ki faire la charité en secret au point kot so la main gauche pas conné saki so la main droite fine fek faire (dépenser – dans le chemin d'Allah)... » (Bukhari, Muslim)*

Allah conné commié parmi nous pas réussi faire ene bonne action sans ki nous attane pou gagne kitchose en retour (Par Exemple : la gloire, l'acclamation de bane dimounes, reconnaissance, récompense) au point kot certains d'entre nous préfère pou pas faire sa bane bonnes actions là si zot alle conné ki zot pas pou gagne en retour reconnaissance ki zot ti pé rechercher si arriver zot faire sa action là.

Hazrat Muhammad (saws) fine aussi dire : « *Ô bane dimounes ! Prier dans zot bane la caze (c'est-à-dire, bane Namaz Nafil), parski meilleure Namaz de l'homme c'est celui ki li faire kot li, sauf pour bane Namaz obligatoires (Farz) ».* (Bukhari).

BANE DIFFERENTS TYPES DE « MONTRÉ LIZIÉ DIMOUNES » (AR-RIYAA)

1. *Ar-Riyaa* au début d'ene action (*Ibaadah*) – Sa annule sa action là.
2. *Ar-Riyaa* pendant ene action (*Ibaadah*) – Faudé obligatoirement ki sa dimoune là repousse sa, et alors so action pou accepté.
3. *Ar-Riyaa* après ene action (*Ibaadah*) – Si kikaine faire éloges de sa action là, action là pas annulé. Dans ene hadith rapporté par Abu Zar (ra) : Le Saint Prophète Muhammad (saws) fine questionné concernant ene dimoune ki fine faire ene bonne action et ki les autres ti pé faire so éloge. Le Messenger d'Allah (saws) fine dire : *C'est ene bonne nouvelle pour ene croyant ».* (Muslim)

Par contre, si sa dimoune là li-même, reproche à ene l'autre bane bonnes actions ki li fine faire pour li, alors sa annule sa action (ou bane actions là). Exemple : « *To rappelle mo fine faire tél-tél z'affaire pour toi... ? »* D'ailleurs, dans Surah Al-Baqara (Chapitre 2 : La Vache), Verset 265, Allah dire : « *Ô bane croyants ! Pas annule zot bane charité par ene rappel ou ene tort... »*

Ar-Riyaa et *Al-Soumrah* zot de ce fait condamnable pour ene vrai croyant. La sincérité dans action ki nous faire li bien important parski sa sincérité là bizin faire seulement pour lizié d'Allah, pour l'appréciation et le plaisir d'Allah ; pas pour bane dimounes. Si ene croyant, de bonne foi faire ene action sans arrière pensée, ou pour donne ene bon l'exemple à l'humanité, pour ki bane dimounes faire bane bonnes actions pour la cause d'Allah, alors en vérité cette action là li acceptable (tout dépanne de *niyyat* (l'intention) de sa dimoune là) parski sa li ene terrain fertile pour ki nous récolter bane les autres bonnes actions. Mais le *Riyaa* et *Soumrah* zot condamnable parski sa invite Shaytane pour prend ene part dans bane actions de bane dimounes et rendre zot inservable et méprisables dans lizié d'Allah.

Ki Allah préserve nous de *Ar-Riyaa* et *Al-Soumrah*. Ki Allah aide nous pou contrôle nous bane passions et fer zot vine esclaves de la lumière divine ki trouve en nous. *Insha-Allah. Ameen.*